

Grunnskóli Drangsness

Aðalbraut 10, 520 Drangsnæs

S. 451-3436

Skólanámskrá

Starfsáætlun 2025-2026



Inngangur.....	3
Um Grunnskólann á Drangnesi.....	3
Skólahúsnæðið.....	3
Stefna skólans.....	4
Starfshættir og skipulag.....	4
Skipulag skólaársins og skóladagatal.....	4
Starfsdagar / undirbúningsdagar.....	4
Skólasetning og morgunverður.....	5
Gestakennsla og stundakennarar.....	5
Gestanemendur.....	5
Skipulag samkennslu.....	7
Skipulag skóladagsins.....	7
Skólaslit.....	7
Foreldraviðtöl.....	7
Áherslur fyrir foreldraviðtöl nemenda, foreldra og kennara.....	7
Ný aðalnámskrá/leiðsagnarmat.....	8
Nemendaping.....	8
Sveigjanleiki.....	8
Hefðir í skólastarfi Grunnskólans á Drangnesi.....	9
Lestraráttak.....	9
Jólaskemmtun og jólaundirbúningur.....	9
Öskudagsskemmtun.....	9
Árshátíð.....	9
Útinám.....	10
Sveitaskóli.....	10
Hugleiðsla.....	10
Samstarf við aðrar stofnanir og nágrannaskóla.....	10
Félagsmiðstöðin Ozon á Hólmavík.....	10
Samstarf við Grunnskólann á Hólmavík.....	10
Samstarf við Árneshrepp.....	11
Samstarf við Reykhóla.....	11
Ólympíuhlaupið, Hugleiðsludagur unga fólksins, Göngum í skólann o.fl.....	11
Starfsáætlun nemenda og upplýsingar um skólanámskrá.....	11
Smiðjur.....	12
Heimanám, heimalestur.....	12
Frá skólaárinu 2023-2024 er aukin áhersla lögð á heimanám í öllum deildum en markmið heimanáms er:.....	12
Valgreinar.....	13
Aðrar námsgreinar.....	14
Vikulegur stundafjöldi.....	14
Námsumsjónarkerfi og notkun stafrænna miðla.....	14
Stuðningur.....	14
Starf stuðningsfulltrúa.....	14
Einstaklingsnámskrár.....	15

Nemendur sem hafa annað móðurmál en íslensku (ÍSAT).....	15
Gagnlegar síður og annað efni sem skólinn hefur aðgang að.....	15
Starfsmenn og starfsmannamál.....	15
Starfsmenn skólans.....	15
Starfsfólk skólans.....	15
Umsjónarkennarar.....	16
Listi yfir starfsfólk skólans.....	16
Móttaka nýrra starfsmanna.....	17
Símenntun og skólaþróun.....	17
Hagnýtar upplýsingar.....	17
Ritföng og önnur námsgögn.....	18
Skólamatur / nesti.....	18
Skólareglur Grunnskólans á Drangsnesi.....	18
Reglur um ástundun, leyfi og veikindi.....	18
Frádráttur á mætingar/hegðunareinkunn er sem hér segir.....	19
Viðbragð við mætingar/hegðunareinkunn.....	19
Móttaka nýrra nemenda.....	19
Móttaka nýrra nemenda sem koma úr leikskóla.....	20
Nemendur og foreldrar.....	21
Móttaka nemenda af erlendum uppruna.....	21
Skólaráð.....	21
Foreldrafélag og foreldrasamstarf.....	21
Nemendaráð.....	21
Sérkennsla/stuðningskennsla og önnur stoðþjónusta.....	22
Foreldrasamstarf og samstarf við nærsamfélagið.....	22
Nýr nemendagrunnur - Frigg.....	22
Matsferill 2025-2026.....	22
Skólaheilsugæsla og fræðsla á vegum hjúkrunarfræðings.....	22
Lyfjagjafir, höfuðlús og fleira.....	23
Ýmsar áætlanir.....	23
Eineltis- og ofbeldisáætlun.....	23
Viðbragðsáætlun við slysum og öðrum áföllum.....	23
Viðbragðsáætlun Almannaþingarinnar vegna veðurs.....	23
Rýmingaráætlun vegna ofanflóða.....	23
Eldvarnar og rýmingaráætlun.....	24
Umhverfisáætlun.....	24
Aðrar áætlanir.....	24
Jafnrétti og mannréttindi.....	24
Mat á skólastarfi í Grunnskólanum á Drangsnesi 2025-2026.....	24
Áætlun um innra mat 2025-2026.....	25

Inngangur

Starfsáætlun Grunnskóla Drangsness er ætlað að lýsa skólahaldi í skólanum ásamt því að gera grein fyrir sérstöðu skólans og staðbundnum aðstæðum. Starfsáætlunin er hluti skólanámskrárinnar en hana er að finna á heimasíðu skólans. Í árlegri starfsáætlun er meðal annars gerð grein fyrir starfsfólki skólans, starfstíma, hefðum og mikilvægum viðburðum í skólastarfinu ásamt fleiri hagnýtum upplýsingum er varða skólastarfið.

Skólanámskráin er birt á heimasíðu skólans

www.drangsnis.is/skoli

Starfsáætlun er endurskoðuð á ári hverju og lögð fyrir bæði skólaráð og fræðslunefnd sveitarfélagsins.

Um Grunnskólann á Drangnesi

Grunnskóli Drangsness var stofnaður árið 1944 og er því 81 ára í ár og má lesa nánar um skólann og sögu skólahalds í Kaldrananeshreppi í samantekt Torfa Guðbrandssonar fyrrverandi skólastjóra að Finnbogastöðum í Árneshreppi á heimasíðu skólans. Bygging sú sem enn hýsir skólann var vígð á lýðveldisárinu 1944 en frá upphafi var hún helguð störfum í þjónustu menntunar og kristnihalds eins og kemur fram í samantekt Torfa. Grunnskólinn á Drangnesi er meðal fámennustu skóla landsins en í honum munu ellefu nemendur á aldrinum átta til fimmtán ára hefja nám haustið 2025 Skólinn er heildstæður og skiptist nú í tvær bekkjardeildar; yngri og eldri bekkjardeild. Við skólahúsið var byggt árið 1988 og er aðstaða góð til kennslu. Skólahúsnæðið er einnig nýtt sem samkomustaður t.d. koma þar saman kvenfélagskonur en í skólahúsnæðinu er leirbrennsluofn í eigu kvenfélagsins Snótar sem samnýttur er af nemendum skólans og félögum kvenfélagsins. Vorið 2016 var skólalóðin endurhönnuð af nemendum LHÍ undir stjórn Rúnu Thors en á henni er einnig sparkvöllur. Á síðasta skólaári var teiknað upp plan af endurbótum á skólalóð með aðkomu nemenda. Verið er að vinna eftir þeirri teikningu og var byrjað á að girða í kringum skólalóðina. Um 50 fm gróðurhús tilheyrir einnig skólanum og á síðustu áramótum var tengt heitt vatn úr nærliggjandi nýrri borholu og er gróðurhúsið því heitt gróðurhús núna. Í skólastarfinu er síaukin áhersla á ræktun matjurta og útikennslu. Við skólann eru einnig heitir pottar í flæðarmálinu en þeir eru eitt stærsta aðdráttarafl hreppsins.

Skólahúsnæðið

Skólahúsnæðið er við Aðalbraut 10 og fer kennsla þar fram og í nágrenni skólans (sjá nánar undir útikennsla). Íþróttakennslan fer fram utandyra þegar veður leyfir að hausti og vori en annars í samkomuhúsinu Baldri og / eða í skólahúsnæðinu. Sundkennsla yngri barna er í sundlauginni á Drangnesi en sund- og íþróttakennarinn Magnea Dröfn Hlynsdóttir verður starfandi við skólann í stuttum sundlotum á bæði haust- og vorönn. Þá fara yngri nemendur einnig í sundleiki einu sinni í viku meðan veður leyfir að hausti og aftur að vori. Mið- og eldri

deild fær sundkennslu á samstarfsdögum á Hólmavík bæði á haust- og vorönn. Þá er bekkjarfundur eldri deildar haldnir vikulega í heitu pottunum fyrir framan skólann.

Stefna skólans

Leiðarljós Grunnskóla Drangsness er að þar sé stundað skólastarf sem skapar öllum nemendum tækifæri og rými til að efla sjálfstæði sitt, ábyrgð og sjálfsþekkingu.

Í Grunnskólanum á Drangsnesi eru allir nemendur einstakir og rík áhersla lögð á að hampa fjölbreytileikanum og skapa svigrúm til að styrkleikar hvers og eins fái að njóta sín. Jákvæð viðhorf, gleði, samkennd og vinátta eru hornsteinninn í skólastarfinu enda öll viðfangsefni auðveldari með jákvæðnina að vopni. Allt þetta miðar að vellíðan nemenda og starfsmanna og skapar jákvæðan skólabrag.

Í skólanum fá nemendur að takast á við fjölbreytt verkefni út frá ólíkum sjónarhornum þar sem styrkleikar hvers og eins fá að njóta sín. Í daglegu starfi er lögð áhersla á að skólinn sé síbreytilegur, í stöðugri þróun og með aðlögunarhæfni til að koma til móts við ólíka samsetningu nemendahópsins hverju sinni, mismunandi þarfir nemenda og áhugasvið þeirra. Unnið er að skólastefnu sveitarfélagsins og er áætlað að þeirri vinnu ljúki á þessu skólaári.

Starfshættir og skipulag

Hér á eftir fylgja upplýsingar sem gefa eiga mynd af því sem einkennir starfshætti og skipulag í Grunnskóla Drangsness. Starfshættir eru fjölbreyttir og vegna mikils sveigjanleika í skólastarfinu sem m.a. er til kominn vegna þess hversu fáir starfa við skólann, hefur reynst auðvelt að bregðast við óskum nemenda og annarra sem koma að skólastarfinu um breytingar. Meðal þess sem einkennir starfshætti skólans er samkennsla, einstaklingsmiðun, þverfaglegt þemanám, samstarf við nágrannaskóla og útinám í einstöku umhverfi skólans ásamt ríkulegu samstarfi við nærsamfélagið.

Skipulag skólaársins og skóladagatal

Í Grunnskólanum á Drangsnesi er skólaárinu skipt í þrjár annir; haustönn, miðönn og vorönn. Markmið með slíkri skiptingu skólaársins er að einfalda skiptingu námsþátta milli anna og draga úr álagspunktum í skólastarfinu í kringum jól og áramót. Með skiptingu námsársins í þrjár annir er nemendum auðvelduð yfirsýn yfir nám sitt og þeim gert kleift að sjá fyrir endann á verkefnum og námseiningum strax frá upphafi. Á móti gerir skiptingin þá kröfu á skólann að nám nemenda sé metið og gert upp með formlegum hætti þrisvar á ári. Hver önn er svo brotin upp í styttri lotur sem afmarkast af þeim vetrarins þar sem tekist er á við ólík viðfangsefni þvert á námsgreinar.

Skóladagar á skólaárinu 2025-2026 eru samtals 180 en lög gera ráð fyrir a.m.k. 180 skóladögum. Skóladagatalið er birt á heimasíðu skólans ár hvert í upphafi nýs skólaárs eða við lok þess fyrra.

Starfsdagar / undirbúningsdagar

Skólaárið 2025-2026 eru starfsdagar á starfstíma nemenda fimm talsins og átta utan starfstíma nemenda.

Skólasetning og morgunverður

Skólasetning er þetta skólaárið þann 22. ágúst. Hefð hefur skapast fyrir því í GD að foreldrar, forráðamenn ásamt nemendum og starfsfólki skólans snæði saman morgunverð að skólasetningu lokinni.

Gestakennsla og stundakennarar

Gert er ráð fyrir tveimur gestakennarasmiðjum á skólaárinu 2025-2026

Ekki er búið að ákveða hvaða gestakennarar verða fengnir þetta skólaárið en áherslan í ár er STEAM samþætting námsgreina og stafræn færni. Verið er að vinna að STEAM samstarfsverkefni með Reykhólum næsta vor, og þar verður líklega önnur af tveimur gestakennarasmiðjum skólaársins.

Með því að fá gesta- og eða stundakennara til starfa við skólann í lengri eða skemmri tíma á hverju skólaári er fjölbreytni í námi við skólann aukinn og nemendum tryggð fagleg og góð kennsla í greinunum. Gestakennsla hefur mælst vel fyrir og er starfsfólk skólans þátttakendur í gestakennslu en hún þjónar einnig þeim tilgangi að kynna nýjar aðferðir í kennslu og fellur því undir endur- og símenntunarpátt kennara.

Gestanemendur

Hefð er fyrir því að taka á móti gestanemendum við skólann s.s. fyrrum íbúum eða öðrum sem tengjast svæðinu. Forráðamenn gestanemenda eru beðnir um að fylla út sérstakt eyðublað, sjá hér að neðan, þar sem óskað er eftir leyfi til að stunda nám við skólann. Nemendur sem eru í haust- eða vetrarfrí frá sínum skólum eru ekki teknir inn sem gestanemendur, enda eru þau frí hugsuð sem skólafrí og skýlaus réttur barna að þurfa ekki að fara í aðra skóla í sínum frítíma. Dvalartími gestanemenda er misjafnlega langur en þó ekki lengri en ein kennsluvika. Ef beiðni berst um námsdvöl í lengri tíma fer hún fyrir fræðslunefnd og síðar sveitarstjórn. Ákjósanlegt er að beiðni um dvöl berist skólastjóra með góðum fyrirvara og ekki seinna en viku fyrir áætlaða dvöl. Skólastjóri ber beiðnina upp á fundi með kennurum og öðru starfsfólki skólans. Gestanemendur fylgja bekk og taka þátt í öllum þeim verkefnum sem unnin eru t.d. í smíðju og öðrum greinum en koma með eigið námsefni ásamt öllu öðru er viðkemur náminu s.s. íþróttafatnað o.s.frv. Gestanemendur fylgja reglum skólans.

Forráðamenn gestanemenda þurfa að láta það koma fram hvort óskað er eftir að nýta þjónustu skólans í frístund/skólaskjóli.

Gestanemendur á mið- og unglingastigi fara ekki með nemendum á samstarfsdaga inn á Hólmavík á þriðju- og fimmtudögum.

Beiðni um gestadvöl við Grunnskóla Drangsness

Nafn og fæðingarár gestanemanda: _____

Bekkur: _____

Dvalartími frá _____ til _____

Óska eftir að nemandi verði með í frístund eftir skóla:

Aðrar upplýsingar s.s. ef um ofnæmi eða annað er viðkemur heilsu og vellíðan barnsins er að ræða. Annað sem mikilvægt er að starfsfólk skólans sé meðvitað um.

Upplýsingar um forráðamann/menn

Heimasími: _____

Farsími: _____

Vinnusími: _____

Netfang: _____

Undirskrift forráðamanns/manna

Skipulag samkennslu

Nemendur eru 11 skólaárið 2025-2026. Á yngsta stigi 1. – 4. bekk eru 3 nemendur, á miðstigi 5. – 7. bekk eru 4 nemendur og á unglingastigi 8. – 10. bekk eru 3 nemendur. Yngsta stigi er kennt sér og mið- og elsta stigi saman. Talsvert ójafnvægi er í nemendafjölda í þessum tveimur samkennsluhópum yngri og eldri, en það markast af því að mið- og unglingastig fer inn á Hólmavík tvisvar í viku í samstarf með Grunnskólanum á Hólmavík.

Skipulag skóladagsins

Grunnskólinn á Drangsnesi er einsetinn skóli. Skólahald hefst kl. 8:30 og lýkur á misjöfnum tíma, yngri deild kl. 13:30 á þriðju- og fimmtudögum og kl. 14:20 á mánu- og miðvikudögum þar sem þeir eru í þemasmiðjum með öllum nemendum skólans. Nemendur í eldri deild eru til kl. 15:00 á mánudaga til fimmtudaga en þeir nemendur sem þurfa að nýta aðstöðu skólans í áhugasviðsvali geta verið í skólanum til kl. 16:00 á mánudögum og miðvikudögum. Á mótí þessum lengdu dögum í miðri viku eru föstudagar styttri og allir nemendur búnir á sama tíma kl. 12:10. Það er liður í fjölskyldustefnu skólans að foreldrar sem hyggjast nýta helgar til ferðalaga hafi rýmri tíma og að þessi tilhögun muni fækka leyfisbeiðnum á föstudögum.

Skólaslit

Skóla verður slitið þetta skólaárið þann 3. júní sem ber upp á miðvikudag. Foreldrar nemenda sjá um veitingar að skólaslitum loknum og nemendur koma að skemmtiatriðum. Skólaslitin er hátíðleg stund þar sem við kveðjumst eftir veturinn og kveðjum þess auki þá nemendur og starfsfólk sem heldur á vit nýrra ævintýra.

Foreldraviðtöl

Foreldraviðtöl eru þrisvar yfir skólaárið í lok hverrar annar. Þá hitta nemendur og foreldrar umsjónarkennara til skrafs og ráðagerða þar sem staða nemandans í námi og skólastarfi er rædd, styrkleikar nemandans dregnir fram og leiða leitað til að frekari árangur náist á sem allra flestum sviðum. Þessar stundir eru ætlaðar til að fara yfir gang námsins, líðan nemenda og hvað það sem getur eflt hann og tryggt sem bestan árangur í námi og skólastarfi.

Í lok miðannar eru foreldraviðtölin nemendastýrð.

Áherslur fyrir foreldraviðtöl nemenda, foreldra og kennara

Hauðtönn: Árangur það sem af er skólaárinu greindur. Leiðir til frekari árangurs ræddar. Fyrir samráðsfundinn meta nemendur eigin stöðu í samráði við foreldra þar sem námsleg staða er rædd og líðan nemenda og staða í skólasamfélaginu skoðuð.

Miðönn: Nemendastýrt viðtal þar sem nemandinn er í aðalhlutverki að greina framvindu sína frá síðast foreldraviðtali og leiðir til frekari árangurs ræddar. Fyrir samráðsfundinn tekur umsjónarkennari viðtal við hvern nemanda þar sem líðan og staða í skólasamfélaginu er skoðuð og greind.

Vorönn: Litið yfir farinn veg. Framfarir kortlagðar. Staða nemandans greind í samhengi við námsmarkmið. Lögð drög að næsta vetri.

Ný aðalnámskrá/leiðsagnarmat

Í Grunnskóla Drangsness er lögð áhersla á fjölbreytni í vinnubrögðum og kennsluaðferðum. Kennarar bera faglega ábyrgð á að velja árangursríkustu leiðirnar til að ná þeim markmiðum sem sett eru. Kennsluaðferðir og vinnubrögð taka tillit til aldurs, þroska og getu nemenda sem í hlut eiga hverju sinni og eðlis viðfangsefnisins.

Í lok hverrar annar er farið yfir þá vinnu og verkefni unnin hafa verið á önninni. Nemendur og kennarar skoða hvort hæfniviðmiðum hafi verið náð og hvert skal stefna.

Á skólaárinu verður innleidd ný aðalnámskrá grunnskóla og samhliða leiðsagnarmati/leiðsagnarnám en það er stór hluti af áherslum nýrrar námskrár. Grunnskóli Drangsness hefur um nokkurt skeið verið að færa sig nær leiðsagnarnámi/leiðsagnarmati, en nú verður það samofið innleiðingu nýrrar námskrár. Námsmat skólans verður í fullu samræmi við áherslur hinnar nýju námskrár en þar stendur m.a: Megintilgangur námsmats er að leiðbeina nemendum um námið og hvernig þeir geti náð markmiðum þess. Með námsmati er fylgst með því hvernig nemendum tekst að ná almennum hæfniviðmiðum aðalnámskrár, stuðlað að námshvatningu, nemendur örvaðir til framfara og metið hverjir þurfa á sérstakri aðstoð að halda. Meta þarf alla þætti námsins, þekkingu, leikni og hæfni með hliðsjón af hæfniviðmiðum í aðalnámskrá. Leggja skal áherslu á leiðsagnarmat sem byggist á því að nemendur velti reglulega fyrir sér námi sínu með kennurum sínum til að nálgast eigin markmið í náminu og ákveða hvert skal stefna. Markmið skólans er að gera nemendur enn meðvitaðri um hæfniviðmið aðalnámskrár sem tengjast hverju verkefni, hverri könnun o.s.frv. Með námsmatinu er lögð áhersla á að nemendur viti hvar þeir standa út frá hæfniviðmiðunum og að gera þá meðvitaða um hvað þeir þurfi að bæta og hvernig þeir geti bætt sig. Í námsáætlunum í hverju fagi má finna þau hæfniviðmið sem lögð eru til grundvallar. Námsáætlanir eru inn á Mentor.

Nemendaping

Að hausti og vori eru nemendaping. Þar taka nemendur og kennarar skólans fyrir tiltekin mál auk þess sem nemendum gefst færi á að koma sínum hugmyndum um hvernig bæta megi skólastarfið á framfæri.

Sveigjanleiki

Starfið í Grunnskólanum á Drangnesi er síbreytilegt og lagar sig að ólíkum aðstæðum hverju sinni. Viðfangsefni nemenda eru fjölbreytt og ólík eftir tímabilum og því nauðsynlegt fyrir skólann að laga sig að starfinu sem á sér stað á hverjum tíma. Þetta er t.d. gert með breytilegum stundaskráum þar sem kennarar sinna ólíkri kennslu og ólíkum verkefnum eftir tímabilum, stöðugu mati á faglegu inntaki og framkvæmd verkefna og viðfangsefna og óttaleysi við að breyta og snúa við ef svo ber undir.

Hefðir í skólastarfi Grunnskólans á Drangnesi

Auk þeirra viðburða sem skipulagðir eru í kringum daga eins og Dag íslenskrar náttúru 16. september, Dag íslenskrar tungu 16. nóvember, Dag læsis 8. september og Dag íslenskrar tónlistar 1. desember hafa skapast ýmsar hefðir í skólastarfi Grunnskólans á Drangnesi undanfarin ár. Yfirlit yfir helstu hefðir og viðburði á skólaárinu fylgir hér á eftir.

Lestraráttak

Lestraráttak hefur verið annað hvert ár við skólann en í ljósi versnandi stöðu læsis á landsvísi hefur verið ákveðið að lestraráttak verði árlegt í 2 mánuði. Þetta skólaárið verður læsi sérstakt áhersluatriði alls skólaársins og lögð áhersla á lestur í öllum greinum. Í september og október taka nemendur þátt í listverkefninu „Svakalega lestrarkeppninni“ sem er listverkefni tengd íslenskri tungu á vegum List fyrir alla.

Jólaskemmtun og jólaundirbúningur

Fyrir jól er fjölskyldum nemenda og öðrum velunnurum skólans boðið á jólaskemmtun þar sem nemendur koma fram og sýna afrakstur vinnu sinnar ásamt því sem boðið er upp á veitingar, dansað kringum jólatré og oft hafa óvæntir gestir komið í heimsókn. Jólaundirbúningur er fólgin í jólasmiðju sem hefst venjulega á aðventunni en í henni er m.a. hugað að söng, bakstri, skreytingum og fleiru auk þess sem greinakennarar flétta gjarnan jólaundirbúningi saman við viðfangsefni í greinunum s.s. eins og íslensku, dönsku og ensku. Í ár verður jólasmiðjan trúarbragðasmiðja þar sem hátíðir ýmissa trúarbragða verða skoðaðar.

Ýmislegt hefur verið gert undanfarin ár s.s. jólamarkaður þar sem nemendur hafa selt vörur sem þeir hafa gert. Í ár munu nemendur og starfsfólk ákveða hvaða samfélagslega verkefni þeir munu gera. Það hefur það að markmiði að skólinn geri sig sýnilegan í samfélaginu og að gera eitthvað fyrir samfélagið sem auðgar það og bætir.

Öskudagsskemmtun

Á öskudag fara nemendur grunnskólans saman grímuklædd um bæinn og syngja fyrir starfsfólk helstu vinnustaða bæjarins. Eftir hádegi bjóða grunnskólanemar svo öllum sem vilja á grímuball þar sem farið er í leiki og kötturinn sleginn úr tunnunni.

Árshátíð

Árshátíð grunnskólans er einn stærsti viðburður skólaársins þar sem nemendur flytja leikrit sem þeir hafa æft vikurnar á undan í árshátíðarsmiðju. Forráðamenn og aðrir velunnarar skólans koma að undirbúningi árshátíðar með því að skipuleggja kökuhlaðborð. Árshátíðin er jafnan vel sótt og er liður í því að kynna starfsemi skólans út á við og leyfa sem flestum að njóta afraksturs vinnu nemenda og starfsfólks skólans. Árshátíðin er einnig liður í fjáröflun nemenda sem á ári hverju halda í skólaferðalag.

Síðastliðin tvö ár hefur verið samstarf við Grunnskóla Hólmavíkur og Leikfélag Hólmavíkur með uppsetningu á árshátíðarverki. Ekki verður slíkt samstarf þetta skólaárið og mun nemendahópurinn í Grunnskóla Drangsness halda sína árshátíð sér og verður árshátíðin 13. febrúar. Þá fara allir nemendur skólans saman í skólaferðalag 28. og 29. maí.

Útinám

Á hverju skólaári eru tvær útinámsvikur, ein að hausti og önnur að vori. Útinámsvika að hausti er með áherslu á nærumhverfið með sérstaka áherslu á hvali og sjávarspendýr. Það er markmið að stórauka þátt útináms í skólastarfi Grunnskóla Drangsness enda býður einstakt umhverfi skólans upp á það. Í Bjarnarfirði er um tuttuga ára gamall skólalundur þar sem nemendur hafa plantað trjáplöntum í gegnum tíðina. Í ár eru tvær kennslustundir á viku fastar í stundarskrá sem útikennsla hjá öllum nemendum skólans. Þessir tímar eru alla mánudaga. Undanfarin 3 ár hafa útikennsluvikur að hausti og vori verið í samstarfi við Grunnskóla Hólmavíkur þar sem nemendur þaðan hafa komið til okkar í heila viku. Þetta skólaárið er stefnt að því að stofna til samstarfs við Grunnskólann á Reykhólum í útikennsluviku að vori. Þetta er hluti af stefnu skólans að vera í fjölbreyttu samstarfi við nágrannaskólana á Hólmavík og nú stefnt á samstarf með Reykhólum. Samstarf við nágrannaskólana þar sem nemendur og kennarar flæða á milli skólanna er í þágu fjölbreyttari kennsluhátta og viðfangsefna á hverjum stað fyrir sig. Útinámsvika að vori er með áherslu á orku og tækni.

Sveitaskóli

Nemendur í yngri deild hafa tekið þátt í starfsemi sveitaskóla í Árneshreppi fyrir 3 árum og fóru einnig sl. vor þangað. Áform eru um að halda áfram að kynna nemendum störf í sveit, í samstarfi við Árneshrepp eða við bændur í okkar sveitarfélagi.

Hugleiðsla

Hugleiðsla hefur verið inni á stundaskrá sl. ár og gefist vel. Í vetur verður hugleiðslustund einu sinni í viku á mið- og vorönn. Hugleiðsla gefur færi á að kyrra hugann og losa um streitu.

Samstarf við aðrar stofnanir og nágrannaskóla

Félagsmiðstöðin Ozon á Hólmavík

Félagsmiðstöðin er fyrir nemendur í 5.-10. bekk á Hólmavík og Drangsnesi, en Kaldrananeshreppur tekur þátt í rekstri félagsmiðstöðvarinnar Ozon á Hólmavík. Venjan er að kynna vetrarstarfið að hausti og hefur grunnskólinn á Drangsnesi leitast við sl. ár að nýta samstarfsdagana á Hólmavík einnig fyrir félagsstarf.

Samstarf við Grunnskólann á Hólmavík

Haustið 2022 hófst tilraunaverkefni með samstarf á milli skólanna á Drangsnesi og Hólmavík. Þann vetur fóru nemendur á mið- og elsta stigi einn dag í viku inn á Hólmavík. Þetta fyrirkomulag gaf góða raun og var ákveðið næsta skólaár 2023-2024 að prófa að hafa samstarfsdagana 2 á viku og hefur það haldist síðan.

Samstarfið hefur verið á ýmsan hátt og ekki eins frá ári til árs. Aðaláherslan er þó á að nemendur nemendur skólanna tveggja nái að kynnast og vinna saman, enda fáir nemendur í báðum skólum og talsverð samlegðaráhrif að kenna þeim saman í ákveðnum fögum. Í vetur sér kennari frá Drangsnesi um alla dönskukennslu nemenda í báðum skólum og fer sú kennsla fram á Hólmavík á samstarfsdögum. Þá er lífsleikni einnig kennd þar af sama kennara.

Samstarf við Árneshrepp

Síðasta skólaár var tilraunaverkefni með Árneshreppi þar sem tveir nemendur þar voru skráðir í skólann á Drangsnesi en stunduðu nám í heimabyggð í Finnbogastaðaskóla frá nóvember til skólaloka. Nemendur í Árneshreppi voru með í sumum kennslustundum á skjá og komu einnig í lotur á Drangsnes. Þessu tilraunaverkefni lauk í vor og var ákveðið að halda því ekki áfram að svo stöddu.

Samstarf við Reykhóla

Í bígerð er að skoða möguleika á samstarfi við Reykhólaskóla og verður það í þróun og vinnslu á þessu skólaári.

Ólympíuhlaupið, Hugleiðsludagur unga fólksins, Göngum í skólann o.fl.

Nemendur Grunnskólans á Drangsnesi taka þátt í Ólympíuhlaupinu eins og fyrri ár. Hugleiðsludagur unga fólksins er árlegt verkefni sem nemendur hafa tekið þátt í og munum við halda því áfram þetta árið líka. Göngum í skólann verður ekki á dagskrá í ár en endurskoðað fyrir næsta haust. Ýmis spennandi verkefni standa nemendum og starfsfólki til boða ár hvert en það fer eftir áherslum á hverju skólaári í hverju ákveðið er að taka þátt.

Starfsáætlun nemenda og upplýsingar um skólanámskrá

Smiðjur

Hluti alls náms í skólanum fer fram í smiðjum (4-6 kennslustundir á viku) og skiptist skólaárið upp í nokkur smiðjutímabil sem ná yfir 6-10 vikur í senn. Í smiðjum er aldrei unnið skemur en í 80-120 mínútur og áhersla lögð á að nemendur fá færi á að komast í flæði. Kennarar vinna saman í teymum að því að þróa og skapa smiðjur í virku samstarfi við nemendur. Í smiðjum er unnið að heildstæðum viðfangsefnum þvert á námsgreinar með sérstaka áherslu á skapandi vinnu, list- og verkgreinar. Eldri og yngri bekkjardeild starfa saman í smiðjum. Smiðjumat er fjölbreytt og fer eftir eðli viðfangsefna, stuðst er við virknimat, jafningjamat.

Smiðjur vetrarins:

25.8 – 19.9:	Hvalir	4 vikur
22.9 – 2.10:	Matur og menning/nærumhverfið	2 vikur
6.10 – 14.11:	Fornleifar / menjar	5 vikur
17.11 – 22.11	Matur og menning / Kólumbía	2 vikur
2.12 – 19.12:	Ljósahátíðir / trúarbrögð	3 vikur
5.1 – 13.2	Árshátíðarsmiðja	6 vikur
23.2 – 27.3	Stríð og friður	5 vikur
7.4 – 30.4	Samfélag / framtíð	4 vikur
4.5 - 13.5	Matur og menning	2 vikur

Heimanám, heimalestur

Frá skólaárinu 2023-2024 er aukin áhersla lögð á heimanám í öllum deildum en markmið heimanáms er:

- Að nemendur dýpki skilning, rifji upp, ígrundi og þjálfði það sem þeir hafa lært í skólanum.
- Að þjálfna skipulagsfærni, auka sjálfstæði og ábyrgð nemanda á eigin námi.
 - Nemandi þarf sjálfur að skipuleggja hvenær hvað er unnið, hafa góða yfirsýn yfir námið, skilaverkefni og fylgjast vel með áætlunum.
 - Nemandi læri að setja sér markmið t.d. í gegnum gerð einstaklingsáætlunar þar sem hann ákveður í samráði við kennara að hverju skuli unnið, tímaramma verkefnis, hvaða hæfniviðmið unnið er með og í hverju ávinningurinn er fólgin.

- Að þjálfar lestur en lestur er undirstaða alls náms og því er heimalestur afar mikilvægur.
- Að gefa foreldrum/forráðamönnum tækifæri til að taka þátt í og fylgjast með námi barna sinna.
- Að tengja námið í skólanum við raunveruleg verkefni á heimili nemanda.

Áætlaður tími sem fer í heimanám:

- Yngsta stig (1.-4. bekkur) Eingöngu heimalestur að lágmarki 15 mín á dag.
- Miðstig (5.-7. bekkur) 80 mín á viku auk heimalesturs að lágmarki 15 mín á dag.
- Elsta stig (8.-10. bekkur) 160 mín á viku auk heimalesturs að lágmarki 15 mín á dag.

Heimanámsstefna skólans er á heimasíðu skólans:

<https://skoli.drangsn.es.is/heimanamsstefna/>

Heimanámsstefnan verður endurskoðuð samhliða innleiðingu nýrrar aðalnámskrár haust 2025.

Í Grunnskólanum á Drangsnesi er markmið nemenda og kennara að ljúka öllu námi á skólatíma. Ef nemendur ná ekki að ljúka verkefnum er þeim lokið heima en einnig er nemendum frjálst að vinna áfram heima í tilteknum verkefnum eða greinum ef áhugi er fyrir hendi. Rík áhersla er lögð á að hver nemandi lesi heima daglega og kvitta forráðamenn fyrir lesturinn. Lestrarbækur eru valdar í skólanum eða af nemendum sjálfum eftir hentugleika og lestrargetu hvers og eins. Í eldri deild er lögð meiri áhersla á góðan undirbúning heima við og gerðar kröfur um að t.d. lestri námsbóka og fleiri verkefnum sé sinnt heima skv. áætlun frá kennara.

Valgreinar

Námsskipulag í elstu deild (8. – 10.b) er þannig að nemendur geta valið námsgreinar að hluta til sjálfir. Með því er reynt að koma betur til móts við þarfir og áhugamál nemenda, en um leið leggur það aukna ábyrgð á herðar þeirra. Valgreinar eru ekki aukagreinar heldur eru þær jafn mikilvægar og skyldugreinarnar og kröfur um ástundun og árangur eru þær sömu og í skyldugreinum.

Nemendur stunda nám í vali sem þau geta að hluta til valið sjálf, en það getur verið starfstengt nám, val út frá áhugamáli, íþrótt eða tónlistarnám. Um persónulega valið er gerður samningur við nemendur og starfsstað, tónlistarskóla eða íþróttafélag ef það á við. Valið er unnið utan skólatíma og er að lágmarki 80 mínútur á viku.

Samstarf við Valgreinaskólann er hluti af námsframboðinu en það hefur ekki hentað sl. skólaár en verður skoðað áfram.

Aðrar námsgreinar

Nánari upplýsingar um aðrar námsgreinar, hæfniviðmið og markmið er að finna undir skólanámskrá á heimasíðu skólans. Í kennsluáætlunum er svo að finna ítarlegar upplýsingar um skipulag kennslunnar í hverri námsgrein, tengsl við hæfniviðmið aðalnámskrá, hvernig námsmat fer fram o.fl.

Vikulegur stundafjöldi

Í Grunnskólanum á Drangnesi ríkir sveigjanleiki en miðað er við að uppfylla lágmarks stundafjölda í hverjum árgangi skv. grunnskólalögum. Á skólaárinu 2025-2026 er vikuleg skólasókn nemenda í yngri deild 31 kennslustund. Í miðdeild (5. -7. bekkur) eru 35 kst. Í unglingadeild (8. - 10. bekkur) eru 35 kennslustundir í töflu og 2 að auki í persónulegu vali.

Við skólann fer fram samkenndi árganga, yngri og eldri að mestu en í sumum smiðjum er öllum nemendum kennt saman s.s. í árshátíðarsmiðju.

Vegna samkenndi fer vikulegur stundafjöldi gjarnan yfir lágmarksfjölda.

Námsumsjónarkerfi og notkun stafrænna miðla

Skólaárið 2023-2024 var námsumsjónarkerfið Mentor tekið í notkun og vonir standa til þess að kerfið muni auðvelda nemendum og forráðamönnum að halda utan um námið.

Stafrænir miðlar og tækni eiga að styðja við nám og skólastarf. Í skólanum læra nemendur að nálgast þessa miðla, fá upplýsingar um hvernig best er að nýta þá og hvað ber að varast. Markmiðið er að börnin öðlist stafræna borgaravitund og átti sig á þeirri ábyrgð sem samskiptum á netinu fylgir ásamt notkun stafrænna miðla. Góð stafræn borgaravitund felst meðal annars í því að koma vel fram hvert við annað í netheimum sem og í raunheimum. Mikilvægt er að samstarf skóla og heimilis sé gott þegar kemur að því að fylgja reglum sem varða stafræna miðla. Í skólastarfinu er gengið út frá því að aldurstakmörk séu virt varðandi notkun samfélagsmiðla og að farið sé eftir viðmiðum um skjátíma barna sjá upplýsingar á Heilsuveru

<https://www.heilsuvera.is/efnisflokkar/throskaferlid/uppeldi-barna/skjarinn-og-bornin/>

Öll notkun stafrænnar tækni í skólanum á að taka mið af persónuverndarlögum og ber skólastjóri ábyrgð á notkun stafrænnar tækni í skólastarfi ásamt því að sinna upplýsingaskyldu gagnvart foreldrum.

Stuðningur

Starf stuðningsfulltrúa

Ef á þarf að halda er leitað leiða til þess að veita nemendum stuðning í nemendahópi með aðstoð stuðningsfulltrúa. Stuðningsfulltrúi vinnur náið með kennurum skólans undir

verkstjórn umsjónarkennara. Skólaárið 2025-2026 sinnir Aðalheiður Dögg Aðalheiðardóttir stuðningi eftir því sem þurfa þykir.

Einstaklingsnámskrár

Teknar hafa verið upp einstaklingsnámskrár í samráði við foreldra/forráðamenn ef þörf þykir á því í einstaka námsgreinum.

Nemendur sem hafa annað móðurmál en íslensku (ÍSAT)

Nemendur sem hafa íslensku ekki að móðurmáli fá sérstakan stuðning í námi eftir þörfum. Lögð er áhersla á að efla orðaforða nemenda m.a. með æfingum, úr Orðagulli, leikrænni tjáningu, samtölum o.s.frv. Nemendur sem hafa íslensku ekki að móðurmáli fá aðstoð við heimalestur inn í stundatöflu. Verkefni hafa verið unnin í sérstöku samstarfi við foreldra og lögð rík áhersla á að nemendur fái að miðla eigin tungu og menningu. Starfsmenn skólans eru í góðu samstarfi við fulltrúa frá þeim löndum sem nemendur koma frá varðandi m.a. túlkabjónustu, aðgang að efni o.s.frv.

Gagnlegar síður og annað efni sem skólinn hefur aðgang að

Skólinn tryggir nemendum og starfsmönnum aðgang að nokkrum gagnlegum síðum sem eru m.a. ætlaðar til þess að styðja við nám og tryggja fjölbreytt námsefni meðal þeirra er Skólavefurinn, 123skóli og Fjölbreyttar kennsluaðferðir. Í hvarvetna er hvatt er til virkrar notkunar þess efnis sem Menntamálastofnun býður upp á á sínum síðum m.a. til þess að efla læsi nemenda.

Starfsmenn og starfsmannamál

Starfsmenn skólans

Skólastjóri er samkvæmt lögum forstöðumaður grunnskóla. Skólastjóri ber ábyrgð á starfi skólans, stjórnar honum og veitir honum faglega forystu. Í samstarfi við fræðslunefnd sér hann um að skólastarf sé í samræmi við gildandi lög, reglugerðir og árlegar fjárveitingar til skólans. Skólastjóri er fulltrúi skólans í nefndum og ráðum er fjalla um málefni skólans sé ekki annað ákveðið og er talsmaður hans út á við. Í fámennum skóla eins og á Drangnesi sinnir skólastjóri einnig kennslu og er hluti af kennarateymi skólans ásamt því að veita skólanum faglega forystu. Starf hans er smæðar skólans vegna afar fjölbreytt og nær yfir breitt svið.

Starfsfólk skólans

Við skólann starfa tveir umsjónarkennarar og skólastjóri sem einnig sinnir kennslu. Við skólann starfar matráður og einn starfsmaður í hlutastarfi sem sinnir stuðningi og frístundastarfi. Við skólann starfa svo tveir skólabílstjórar.

Kennarar sem ráðnir eru til starfa í grunnskóla gegna því starfi samkvæmt lögum, reglugerðum, aðalnámskrá grunnskóla og kjarasamningi FG. Siðareglur fyrir kennara voru samþykktar árið 2002 og hafa kennarar þær reglur að leiðarljósi í starfi sínu.

Umsjónarkennarar

Umsjónarkennarar gegna veigamiklu hlutverki í sambandi við velferð nemenda í skólanum. Skv. 13. Gr. Grunnskólalaganna skal umsjónarkennari fylgjast náið með námi og þroska nemenda sinna, líðan, almennri velferð. Hann skal leiðbeina þeim í námi og starfi, aðstoða og ráðleggja þeim um persónuleg mál og stuðla að því að efla samstarf skóla og heimila.

Fyrir hverja bekkjardeild eða námshóp velur skólastjóri, í samráði við kennara, umsjónarkennara. Umsjónarkennari fylgist með námi nemenda sinna og þroska, leiðbeinir þeim í námi og starfi, aðstoðar og ráðleggur þeim um persónuleg mál og er í nánú sambandi við heimilin. Umsjónarkennari vakir yfir velferð nemandans og gerir fyrstu tillögur til úrbóta ef hallar undan fæti. Hann fylgist m.a. með skólasókn nemenda og miðlar upplýsingum til foreldra.

Umsjónarkennarar boða foreldra formlega til funda í foreldraviðtöl í lok hverrar annar yfir veturinn en auk þess hafa þeir síma- og/eða tölvusamband við þá eftir því sem þörf er á.

Listi yfir starfsfólk skólans

Nafn	Starfsheiti
Heiðrún Helga Hjörvarsdóttir	Umsjónarkennari yngri deildar
Esther Ösp Valdimarsdóttir	Umsjónarkennari eldri deildar
Ásta Þórisdóttir	Skólastjóri og kennari
Stephan Kalt	Ræstitæknir og matráður eftir jól
Juan Carlos Norena	Matráður fyrir jól
Aðalheiður Dögg Aðalheiðardóttir	Stuðningsfulltrúi og frístundaleiðbeinandi

Finnur Ólafsson	Skólabílstjóri
Anna Björg Þórarinsdóttir	Skólabílstjóri

Hægt er að ná í starfsmenn skóla á skólatíma og á auglýstum viðtalstímum kennara sem gefnir eru upp að hausti.

Símanúmerið er 451-3436

Netfang skólastjóra er skoli@drangsnes.is

Heimasíðan: www.drangsnes.is/grunnskoli

Móttaka nýrra starfsmanna

Við ráðningu er nýju starfsfólki sýnt skólahúsnæðið og kynnt fyrir öðru starfsfólki. Skólastjóri fundar með nýju starfsfólki um ýmislegt sem varðar húsnæði skólans og störf viðkomandi. Nýtt starfsfólk fær jafnframt upplýsingar um trúnaðarskyldur.

Þagnarskylda undirrituð.

Siðareglur kennara skoðaðar.

Farið yfir starfslýsingu.

Starfsmanni veittur aðgangur að ýmsum gögnum eftir því sem við á.

Símenntun og skólapróun

Í Grunnskólanum á Drangsnesi er lögð áhersla á að starfsmenn eigi kost á símenntun innan sem utan stofnunar í þeim tilgangi að auka þekkingu sína og faglega hæfni. Vegna smæðar skólans er nauðsynlegt að nýta þá símenntun sem í boði er á vegum annarra stofnana ásamt því sem ætlunin er að taka virkan þátt í námskeiðum, fyrirlestrum og fleiru sem skipulagt er í samstarfi við nágrannaskólana. Kennarar og skólastjóri fara yfir símenntun í árlegu starfsþróunarviðtali.

Starfsmenn skólans sækja námskeið, fyrirlestra og ráðstefnur á ári hverju. Í upphafi hvers skólaárs er hugað að endurmenntun starfsmanna og hefð skapast fyrir því að sækja sameiginlega ráðstefnu áður en skólastarf hefst. Hugað er að þróunarstarfi í lok hvers skólaárs. Unnið er að nánari áætlun og útfærslu á símenntun og þróunarstarfi innan skólans.

Hagnýtar upplýsingar

Ritföng og önnur námsgögn

Skólinn sér nemendum fyrir ritföngum og öðrum námsgögnum. Ritföng eru geymd í skólanum og merkt hverjum nemenda.

Skólamatur / nesti

Nemendur koma með nesti með sér í nestisstund en frá og með september 2024 er starfrækt skólamötuneyti í Grunnskóla Drangsness á mánudögum – fimmtudags og er það nemendum að kostnaðarlausu.

Nauðsynlegt er að nemendur hafi með sér hollt og gott nesti í skólann og fylgja viðmið hér að neðan um það sem er í boði að taka með sér.

- Ávexti og grænmeti
- Brauð með áleggi, t.d. osti, grænmeti, eggjum, kjöti eða fiskmeti
- Ósykraða drykkjar-/mjólkurvörur

Skilaboðin til barnanna eru þau að manni líði vel af því að borða hollan mat og að það hafi áhrif á árangur í skóla og frístundum.

Skólareglur Grunnskólans á Drangsnesi

Skólareglar eru samdar á hverju hausti í samstarfi nemenda og starfsfólks skólans. Skólareglur eru birtar á heimasíðu skólans.

Reglur um ástundun, leyfi og veikindi

Leyfi og veikindi skal tilkynna til skóla svo fljótt sem auðið er í síma 451-3436 eða 6635319, veikindi má einnig skrá í gegnum Mentor, sjá nánar hér https://www.infomentor.is/wp-content/uploads/2024/03/Handbok-fyrir-adstandendur_september_23_2.pdf

Nemendur í leyfi þurfa að fylgja áætlunum sínum og skila verkefnum fyrir eða eftir leyfi í samráði við umsjónarkennara.

Leyfi er ekki samþykkt fyrr en staðfesting hefur borist frá skólastjóra.

„Sæki forráðamaður skólaskylds barns um tímabundna undanþágu þess frá skólasókn er skólastjóra heimilt að veita slíka undanþágu í samráði við umsjónarkennara telji hann til þess gildar ástæður. Forráðamaður skal þá sjá til þess að nemandinn vinni upp það sem hann kann að missa úr námi á meðan á undanþágu stendur.“

Úr lögun nr. 66/1995 um grunnskóla, 8. gr.

Foreldrar / forráðamenn fylla út tiltekið leyfisform ef þeir fara fram á leyfi fyrir börn sín sem nemur tveimur skóladögum eða fleirum.

Hver nemandi byrjar með 10,0 í mætingar/hegðunareinkunn í upphafi hverrar annar. Fjarvistir, brottrekstur úr kennslustundum, að koma seint eða ámælisverð framkoma utan eða innan kennslustofu koma síðan til frádráttar. Þau stig sem eftir eru í lok anna teljast mætingar/hegðunareinkunn og færast á vitnisburðarblöð. Hver og einn nemandi er einstakur og aðstæður nemenda ólíkar. Þess er gætt í hvívetna að taka ávallt tillit til aðstæðna nemenda þegar mætingar/hegðunareinkunn er metin. Þessi einkunn er sérstök einkunn óháð frammistöðu í einstökum námsgreinum.

Frádráttur á mætingar/hegðunareinkunn er sem hér segir

(S) Seinkomur:

Komi nemandi of seint í kennslustund er það skráð á Mentor.

Eftir fyrstu skráðu seint-komu er enginn frádráttur en eftir það dragast 0,2 frá fyrir hvert skipti.

(R) Brottrekstur úr kennslustund og ámælisverð framkoma:

Fyrir R sem fært er í Mentor kemur 1,0 til frádráttar. Ekki er nauðsynlegt að víkja nemanda úr kennslustund þótt R sé fært inn, heldur er litið á það sem mælikvarða á hegðun nemanda. Alltaf skal láta umsjónarkennara vita ef um brottrekstur úr kennslustund er að ræða. Einnig skulu foreldrar/forráðamenn fá vitneskju um málið. Skólastjóri skal alltaf fá tilkynningu um mál sem varða brottrekstur eða vítaverða framkomu nemenda, hún skal einnig færð inn í samskiptabók.

(Ó) Óheimilar fjarvistir:

Fyrir fyrsta Ó kemur enginn frádráttur ef nemandi hefur sofið yfir sig í fyrsta tíma að morgni, en eftir það dragast 0,5 frá mætingar/hegðunareinkunn fyrir hvert skipti.

Ef nemandi er fjarverandi án leyfis í heilan dag, skal umsjónarkennari hans leita skýringa á því og meta síðan fjarveru hans til frádráttar, þó ekki meira en frádráttarreglur segja til um.

Viðbragð við mætingar/hegðunareinkunn

Fari nemandi niður fyrir 8,0 í mætingar/hegðunareinkunn skal umsjónarkennari tilkynna það foreldri/forráðamanni hans. Ástundun nemenda er rædd ef á þarf að halda í samráðsfundum og oftast ef þörf þykir.

Móttaka nýrra nemenda

Nemendur sem hefja nám við skólann eftir að hafa stundað nám við aðra skóla eru sérstaklega boðnir velkomnir og er fyrsta skólaárið fylgst vel með líðan þeirra og gengi í samstarfi við foreldra. Umsjónarkennari og skólastjóri hafa umsjón með því að fylgja aðlögun nýrra nemenda eftir og grípa inn í ef þörf er á. Hér á eftir fylgir skipulag um móttöku nýrra nemenda.

Síðustu ár hefur ekki verið starfræktur leikskóli á Drangnesi vegna fámennis, en til stendur að opna leikskóla að nýju haustið 2026.

Móttaka nýrra nemenda sem koma úr leikskóla

Að vori

Nemendur á síðasta ári leikskólans koma í reglulegar heimsóknir í skólann áður en hin eiginlega skólaganga hefst. Dæmi um skipulag þessara heimsókna má sjá hér að neðan. Hlé er gert í verkefnavikum.

JANÚAR	FEBRÚAR	MARS	APRÍL	MAÍ
Fundað með leikskóla, foreldrum og barni	Fundað með foreldrum			Sund
2 kest	2-5 kest	2-5 kest	2-5 kest	Sund
2 kest	2-5 kest	2-5 kest	2-5 kest	Sund
2 kest	2-5 kest	2-5 kest	2-5 kest	Sund
2 kest	2-5 kest	2-5 kest	2-5 kest	

Skólastjóri, umsjónarkennari yngri barnadeildar og starfsmenn Leikskóla á Drangnesi skipuleggja þessar heimsóknir í sameiningu en þær skulu frágengnar í lok haustannar á hverju skólaári.

Í fyrstu heimsókninni tekur umsjónarkennari yngri deildar á móti leikskólanemum og einum starfsmanni leikskólans og sýnir þeim skólann. Í þessari heimsókn eru foreldrar sérstaklega boðnir velkomnir með og nemendur grunnskólans kynna sig og skólann sinn fyrir verðandi nemendum. Hverjum nýjum nemenda er útdeilt „mentor“ úr nemendahópi skólans sem hefur m.a. það hlutverk að veita nýnemanum öryggi og veita upplýsingar um skólastarfið.

- Kennarar grunnskólans boða börnin í samráði við leikskólakennara og ráða stærð hópanna sem boðaðir eru og þeirri dagskrá sem boðið er upp á.

- Heimsóknin taki um tvær kennslustundir.

Að hausti

Nemendur og foreldrar

Í ágúst, í byrjun nýs skólaárs fá nemendur og foreldrar þeirra bréf með öllum helstu upplýsingum um skólastarfið framundan.

Móttaka nemenda af erlendum uppruna

Unnið er að móttökuáætlun fyrir börn af erlendum uppruna og er stefnt að því að hún verði tilbúin eigi síðar en í desember 2025.

Skólaráð

Í 8. grein grunnskólalaga stendur að við grunnskóla skal starfa skólaráð sem er samráðsvettvangur skólastjóra og skólasamfélags um skólahald. Frá hausti 2015 hefur verið starfrækt skólaráð sem skipað er eftirfarandi fulltrúum skólaárið 2024-2025:

Ásta Þórisdóttir skólastjóri

Heiðrún Helga Hjörleifsdóttir fulltrúi kennara

Esther Ösp Valdimarsdóttir fulltrúi kennara

Anna Björg Þórarinsdóttir fulltrúi foreldra

Stephan Kalt fulltrúi foreldra

Íris Líf Þuríðardóttir fulltrúi nemenda

Friðgeir Logi Halldórsson fulltrúi nemenda

Tomas Fisera fulltrúi nemenda

Haraldur Vignir Ingólfsson fulltrúi grenndarsamfélagsins

Foreldrafélag og foreldrasamstarf

Í foreldrafélagi Grunnskólans á Drangnesi sitja Anna Björg Þórarinsdóttir og

Matthildur Guðrún Ómarsdóttir

Nemendaráð

Á hverju hausti er skipað í nemendaráð og kjósa nemendur sjálfir sína fulltrúa. Esther Ösp Valdimarsdóttir hefur umsjón með félagsstarfi skólans og veitir nemendaráð aðstoð. Nemendaráð hefur m.a. umsjón með skipulögðum viðburðum fyrir nemendur skólans. Í nemendaráði fá nemendur færi á að kynnast félagsstarfi og koma með virkum hætti að skipulagi skólastarfsins.

Sérkennsla/stuðningskennsla og önnur stoðþjónusta

Við skólann starfa ekki sérfræðingar s.s. skólasálfræðingur, þroskabjálfi, náms- og starfsráðgjafi, talmeinafræðingur og iðjubjálfi en leitað er til sérfræðinga í gegnum samstarf skólans við Grunnskólann á Hólmarvík í Strandabyggð og fræðsluyfirvöld á svæðinu. Leitað er leiða til þess að tryggja nemendum á unglingastigi aðgang að náms- og starfsráðgjafa a.m.k. tvisvar á hverju skólaári en skólastjóri sinnir að öðrum kosti hlutverki náms- og starfsráðgjafa.

Foreldrasamstarf og samstarf við nærsamfélagið

Gott samstarf heimilis og skóla liggur góðu skólastarfi til grundvallar. Foreldrar og forráðamenn skólans ásamt öðrum velunnurum skólans (ömmum, öfum, systkinum og íbúum hreppsins) eru sérstaklega hvattir til þess að heimsækja skólann. Foreldrar eiga greiðan aðgang að skólanum og starfsmönnum hans auk þess sem kennarar hafa fasta viðtalstíma, samráðsfundir eru haldnir þrisvar sinnum yfir skólaárið. Foreldrar taka þátt í helstu viðburðum skólans og opnum húsum, skiptast á að sjá um veitingar og koma að undirbúningi árshátíðar. Kaldrananeshreppur er fámennnt sveitarfélag og hefur skólinn mikilvægu og fjölbættu hlutverki að gegna, í honum er kapella þar sem kirkjulegar athafnir fara fram. Íbúar koma að starfi skólans á ýmsan hátt, heimsækja okkur á opnum húsum og koma til aðstoðar þegar þörf er á ásamt því að taka á móti nemendum og starfsmönnum. Mikilvægt er að hlúa áfram að þessu sambandi og samstarfi sem ríkir á milli íbúa hreppsins og skólans.

Nýr nemendagrunnur - Frigg

Frigg, nýr nemendagrunnur er í innleiðingaferli hjá MMS og munu allir nemendur á Íslandi vera skráð í hann. Í lok september verða nemendaupplýsingar uppfærðar í Skólagátt, en gögn verða færð þaðan í hinn nýja nemendagrunn og á því að vera lokið í byrjun nóvember. Á nýju ári eiga allar upplýsingar að vera komnar í nýjan nemendagrunn.

Matsferill 2025-2026

Nýr matsferill er í innleiðingu á landsvísu. Í september verður Lesfimi lögð fyrir í Skólagátt eins og undanfarin ár, en í janúar 2026 verða allir skólar með lesfimi og stuðningspróf í nýju viðmóti Matsferils. Í mars verða lögð fyrir samræmd stöðu- og framvindupróf í lesskilningi og stærðfræði og er skólum skylt að leggja þau fyrir nemendur í 4., 6. og 9. bekk en skólinn getur ákveðið að leggja það fyrir í öðrum bekkjum líka. Niðurstöður úr þessum prófum verða svo sendar skólum í apríl.

Skólaheilsugæsla og fræðsla á vegum hjúkrunarfræðings

Hjúkrunarfræðingur og læknir Heilbrigðisstofnunar Vesturlands, Hólmavík annast heilsugæslu í Grunnskólanum á Drangsnesi. Reglubundið heilbrigðiseftirlit fer fram í skólanum og annast hjúkrunarfræðingur einnig fræðslu og forvarnarkennslu hvað m.a. varðar kynheilbrigði og holla lífshætti. Kristín Guðbjörg Arnardóttir er skólahjúkrunarfræðingur skólanna á Ströndum.

Lyfjagjafir, höfuðlús og fleira

Samkvæmt fyrirmælum Landlæknisembættisins eru sérstakar vinnureglur varðandi lyfjagjafir til nemenda á skólatíma. Þar kemur meðal annars fram að skólabörn skulu ekki fá önnur lyf í skólanum en þau sem hafa verið ávísuð af lækni. Í engum tilvikum getur barn borið ábyrgð á lyfjatökunni, ábyrgðin er foreldra. Börn skulu ekki hafa nein lyf undir höndum í skólanum nema í algjörum undantekningartilvikum. Slíkar lyfjagjafir geta t.d. verið insúlíngjafir sem barnið sér sjálft alfarið um. Foreldrar/forráðamenn þeirra barna sem þurfa að taka lyf á skólatíma skulu hafa samband við skólaheilsugæslu og eða skólastjóra sem skipuleggur lyfjagjafir á skólatíma. Ef upp kemur höfuðlús eru foreldrar/forráðamenn hvattir til þess að láta starfsmenn skóla vita. Viðeigandi bréf eru send út til nemenda með nánari upplýsingum.

Ýmsar áætlanir

Eineltis- og ofbeldisáætlun

Er á heimasíðu skólans.

Viðbragðsáætlun við slysum og öðrum áföllum

Í áfallaáætlun skólans eru upplýsingar um hvernig eigi að bregðast við slysum og öðrum alvarlegum áföllum sem upp kunna að koma. Hún er á heimasíðu skólans.

Viðbragðsáætlun Almanna- og vegna veðurs

Mikilvægt er að foreldrar fylgist með veðri og veðurspám og hagi sér í samræmi við aðstæður hverju sinni. Foreldrar leggja sjálfir mat á hvort fylgja þarf barni í skóla þótt engin tilkynning hafi borist frá yfirvöldum. Meti foreldrar aðstæður svo að ekki sé óhætt að börn þeirra sæki skóla vegna veðurs þá skulu þeir tilkynna skólanum um það og lítur skólinn á slík tilvik sem eðlileg forföll. Hið sama gildir ef foreldrar lenda í vandræðum á leið sinni til skóla og verða frá að hverfa.

Sjá nánar á heimasíðu skólans.

Rýmingaráætlun vegna ofanflóða

Við Grunnskólann á Drangsnesi getur orðið hætt á ofanflóðum. Ef tilkynning berst frá Veðurstofu Íslands um að hætta sé á ofanflóði á Drangsnesi skal unnið eftir eftirfarandi rýmingaráætlun:

1. Skólastjóri fær boð frá Veðurstofu Íslands um að hætta sé á ofanflóði. Þar sem um hættuástand er að ræða ræsir skólastjóri viðvörunarvælu og hringir í síma 112 og tilkynnir um hættu.
2. Kennarar undirbúa rýmingu kennslustofunnar og fara eftir ákveðnum leiðbeiningum sem er að finna í öllum kennslustofum. Teikningar af útgönguleiðum eru á göngum skólans. Nemendur yfirgefa ekki kennslustofur fyrr en kennari hefur kannað hvort útgönguleiðin sé greið. Hver kennari er ábyrgur fyrir þeim bekk/hóp sem hann er að kenna þegar hættuástand skapast og að koma nemendum á rétt söfnunarsvæði og þarf hann að muna eftir nafnalista. Ætíð skal velja þann neyðarútgang sem er næstur. Sá aðili sem síðastur fer út úr hverri stofu skal loka öllum hurðum á eftir sér.
3. Þegar komið er út á söfnunarsvæðin er mjög mikilvægt að nemendur standi í stafrófsröð hjá sínum kennara sem fer yfir nafnalistann og kannar hvort allir séu komnir út. Kennarinn kemur síðan upplýsingum um stöðuna til umsjónarmanns söfnunarsvæðis.
4. Umsjónarmenn söfnunarsvæða koma upplýsingum um stöðuna til skólastjórnenda eða umsjónarmanns.
5. Þegar björgunaraðilar koma á staðinn gefur skólastjórnandi/umsjónarmaður varðstjóra upplýsingar um stöðuna.

Eldvarnar og rýmingaráætlun

Er á heimasíðu skólans.

Umhverfisáætlun

Skólaárið 2018-2019 unnu nemendur ásamt starfsmönnum að umhverfisáætlun skólans og er hún birt á heimasíðu skólans. Hún hefur ekki verið uppfærð.

Aðrar áætlanir

Nánari upplýsingar um áætlanir skólans s.s. eins og varðandi netöryggi, umferðaröryggi og fleira má nálgast hjá skólastjóra og eða eru birtar á heimasíðu skólans.

Jafnrétti og mannréttindi

Jafnréttisáætlun skólans má nálgast á heimasíðu hans.

Mat á skólastarfi í Grunnskólanum á Drangsnesi 2025-2026

Skv. grunnskólalögum ber hverjum grunnskóla að meta með kerfisbundnum hætti árangur og gæði skólastarfs með virkri þátttöku starfsmanna, nemenda og foreldra eftir því sem við á. Grunnskóli á að birta opinberlega upplýsingar um innra mat sitt, tengsl þess við skólanámskrá og áætlanir um umbætur.

Í fámennum skóla reynist erfitt að fylgja þeim kröfum sem gerðar eru um skipulag mats í grunnskólalögum og aðalnámskrá grunnskóla. Mat á skólastarfi er tvíþætt; annars vegar er um að ræða mat sem framkvæmt er innan skólans, innra mat og hins vegar mat sem utanaðkomandi aðili vinnur á vegum sveitarfélags, ráðuneytis menntamála eða annarra aðila, ytra mat.

Áætlun um innra mat 2025-2026

Leitast er við að kanna líðan nemenda og stöðu þeirra í námi reglulega á skólaárinu og verða lagðar fyrir tengslakannanir í aðdraganda samráðsfundar að hausti og líðankannanir við lok miðannar. Kennarar taka saman helstu niðurstöður og gera áætlun um viðbrögð og hvort ástæða sé til að leita eftir sérfræðisþjónustu.

Leitast er við að bæta námsmat með fjölbreyttum matsaðferðum. Könnun meðal kennara verður lögð fyrir í lok 2. annar og gerðar tillögur til úrbóta.

Upplýsingar um lesferil eru teknar saman og kynntar fyrir foreldrum.

Líðan og staða starfsfólks er könnuð í starfsmannaviðtölum og svara þeir formlegum spurningalista áður en að viðtali kemur. Snar þáttur í virkri þátttöku nemenda við umbætur og breytingar á starfi skólans er skólafundur sem haldinn er tvisvar sinnum á hverju skólaári þar sem nemendur koma með tillögur að breytingum og setja fram óskir sínar varðandi skólastarfið. Skólafundur er mikilvægur umræðuvettvangur um allt starf sem fer fram innan skólans og hefur skilað jákvæðum breytingum á skólastarfinu.

Niðurstöður skal nýta til úrbóta í skólastarfi að höfðu samráði við skólaráð. Niðurstöður mats eru ávallt kynntar starfsmönnum, nemendum, foreldrum/forráðamönnum, skólanefnd og að endingu birtar á heimsíðu skólans. Sjá nánar á heimasíðu skólans.

Ytra mat er framkvæmt af utanaðkomandi aðila sem leggur mat á starfsemi viðkomandi skóla með hliðsjón af gildandi lögum, reglugerðum og aðalnámskrám. Það er meðal annars gert með því að skoða fyrirliggjandi gögn um starfsemi skóla, heimsóknir úttektaraðila og viðtöl við nemendur, starfsfólk skóla og foreldra. Haustið 2020 var framkvæmt ytra mat á skólastarfinu og gefin út skýrsla um það. Unnið hefur verið í mörgum þáttum til úrbótar í kjölfarinu.

Foreldrum, forráðamönnum, nemendum og öllum þeim sem áhuga hafa á að kynna sér nánar starfsemi skólans er bent á heimsíðu hans www.drangsnes.is/grunnskoli eða með því að hafa samband við skólastjóra skoli@drangsnes.is